



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-403-5/25**
Datum: **11.11.2025. godine**

„Agencija za vodno područje rijeke Save“ Sarajevo rješavajući po zahtjevu pravnog lica „M.I. GORA“ d.o.o. Sarajevo, za donošenje rješenja o vodnoj dozvoli za aktivnosti koje mogu imati specifične uticaje na vode u toku rada sa lokacije pogona klaonice krupne i sitne stoke i prerade mesa, izgrađenih u naselju Kamenica, općina Vogošća, na osnovu člana 139. stav (1) tačka 10. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98, 48/99 i 61/22) donosi

R J E Š E N J E **o vodnoj dozvoli**

1. Pravnom licu „M.I. GORA“ d.o.o. Sarajevo daje se vodna dozvola za aktivnosti koje mogu imati specifične uticaje na vode u toku rada sa lokacije pogona klaonice krupne i sitne stoke i prerade mesa, izgrađenih na zemljištu označenom kao k.č. broj 1709, 1710/1, 1710/3, 1711/2, 1711/3 K.O. Gora, općina Vogošća, Sarajevo.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola od strane drugih nadležnih organa, a sve u skladu sa važećim zakonskim propisima, uredbama i dr.
3. Vodna dozvola se daje na osnovu činjeničnog stanja utvrđenog pregledom dostavljene projektne i druge dokumentacije, izvršenog uviđaja na lokaciji i pod slijedećim uslovima:
 - 3.1. Da se upotreba i korištenje predmetnog objekta vrši u skladu sa urađenom investiciono tehničkom dokumentacijom, koja je služila kao podloga za davanje ove vodne dozvole i uslovima iz ove vodne dozvole.
 - 3.2. Vlasnik, odnosno korisnik poslovnog objekta je obavezan da izgrađene objekte, a čija svrha je odvođenje i zbrinjavanje otpadnih voda, redovno održava i koristiti na način koji će obezbijediti njihovu potpunu ispravnost i funkcionalnost.
 - 3.3. Da se prikupljanje tehnoloških otpadnih voda od pranja radnih površina i opreme koja se koristi u procesu klanja i obrade mesa vrši putem podnih slivnika sa linijskim rešetkama i kanalizacionom mrežom odvede u zasebni podzemni betonski dvokomorni vodonepropusni spremnik – osočnu jamu bez preлива (nije dozvoljeno bilo kakvo ispuštanje u prirodni recipijent).
 - 3.4. Da se privremeno i konačno zbrinjavanje klaoničkog konfiskata koji nastaje u postupku klanja i obrade trupala kao i drugih nusproizvoda (krv, iznutrice, kože i dr.), vrši u skladu sa Zakonom o veterinarstvu i Pravilnikom o načinu postupanja sa životinjskim lešinama i otpadom životinjskog porijekla i propisima iz oblasti zaštite okoliša.
 - 3.5. Konačno zbrinjavanje krvi vršiti u skladu sa Zakonom o veterinarstvu i Pravilnikom o načinu postupanja sa životinjskim lešinama i otpadom životinjskog porijekla i propisima iz oblasti zaštite okoliša, a krv od iskrvavljenja životinja nakon klanja koja se prikuplja putem slivnika mora se skladištiti u betonskom vodonepropusnom podzemnom spremniku bez odvoda i preлива u prirodni recipijent.
 - 3.6. Da se vrši redovno pražnjenje spremnika tehnoloških otpadnih voda i spremnika krvi od strane ovlaštene firme, odvoz i konačno zbrinjavanje otpadnog mulja i taloga, kao i opasnog otpada sa lokacije predmetnog proizvodnog kompleksa koji može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja, neophodno je voditi službenu evidenciju.
 - 3.7. Da se spriječi nekontrolisano rasipanje tečnog i krutog otpada iz osočne jame i đubrenke po okolnom zemljištu.

- 3.8. Da se aplikacija đubriva, iz đubrenke, na poljoprivredne površine vrši u skladu sa pravilima dobre poljoprivredne prakse i van područja vodnog dobra i zona sanitarne zaštite izvorišta vode za piće, a u cilju zaštite površinskih i podzemnih voda.
 - 3.9. Da korisnik obavezno praktikuje suho čišćenje radnih površina i poda, a prije pranja vodom, da bi se uklonile organske nečistoće sa radnih površina, trošilo manje vode za pranje i time smanjilo zagađenje u otpadnim vodama.
 - 3.10. Da se koristi uređaj za pranje pod pritiskom kako bi se smanjila potrošnja vode kod finalnog pranja radnih površina, a samim tim i količina otpadne vode.
 - 3.11. Da se, u skladu sa propisima iz oblasti zaštite okoliša, vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
 - 3.12. Otpad koji nastaje u postupku klanja i obrade trupala kao i drugi nusproizvodi, te mulj iz spremnika za prihvrat otpadnih voda, ne smije se odlagati na česticu «vodno dobro», odnosno u vodotoke i na njegove obale.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Prilog 1, Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda tačka 22. tabele, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 5. U periodu važenja ove vodne dozvole, pravno lice, odnosno korisnik objekta je dužan provoditi sve mjere i aktivnosti propisane istom.
 6. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, vlasnik odnosno korisnik predmetnog objekta obavezan je izvijestiti nadležne organe i izvršiti vanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
 7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu sa pratećim sadržajima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
 8. Prava stečena po ovoj vodnoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 9. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godina, od dana pravosnažnosti ovog rješenja.
 10. Prije isteka važnosti ove vodne dozvole, Investitor, odnosno korisnik objekta je dužan da podnese zahtjev za izdavanje nove vodne dozvole.
 11. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice „M.I. GORA“ d.o.o. Sarajevo, obratilo se ovoj Agenciji sa zahtjevom za donošenje rješenja o vodnoj dozvoli za aktivnosti koje mogu imati specifične uticaje na vode sa lokacije pogona klaonice krupne i sitne stoke i prerade mesa, izgrađenih na zemljištu označenom kao k.č. broj 1709, 1710/1, 1710/3, 1711/2, 1711/3 K.O. Gora, općina Vogošća, Sarajevo.

U provedenom postupku dostavljena je i pregledana slijedeća dokumentacija:

- Kopija Aktuelnog izvoda iz sudskog registra Općinskog suda u Sarajevu, broj: 065-0-RegZ-25-011424 od 09.09.2025. godine;
- Kopija Uvjerenja o poreznoj registraciji od 11.02.2016. godine izdato od strane Porezne uprave Federacije BiH– Kantonalni porezni ured Sarajevo;
- Punomoć;

- Kopija Potvrde o upisu u registar odobrenih i registrovanih objekata na teritoriji Kantona Sarajevo, broj: 07-06-24-16522/19 MD od 05.11.2019. godine;
- Kopija Rješenja o odobrenju za izvođenje radova na rekonstrukciji, dogradnji, nadziđivanju i prenamjeni postojećeg poslovnog u proizvodno-poslovni objekat klaonice sa preradom mesa i izgradnju gospodarskog objekta za depo stoke, doneseno od strane Službe za urbanizam i prostorno planiranje, broj: 05-23-2668/15 dana 21.10.2015. godine;
- Kopija Zbirnog izvještaja stručne Komisije o rezultatima tehničkog pregleda izvedenih radova na rekonstrukciji, dogradnji, nadziđivanju i prenamjeni postojećeg poslovnog objekta u proizvodno-poslovni objekat klaonice sa preradom mesa i izgradnja gospodarskog objekta za depo stoke, u Vogošći, naselje Kamenica, Investitor: Hasanović Edna od 01.11.2017. godine;
- Kopija Rješenja o odobrenju za upotrebu, donesen od strane Službe za urbanizam i prostorno planiranje Općine Vogošća, broj:05-23-835/17, dana 12.12.2017. godine;
- Kopija Rješenja kojim se utvrđuje da su u poslovnim prostorijama društva „Mesna industrija Gora“ d.o.o. Sarajevo u Vogošći, u ul. Kamenica bb, na adresi sjedišta društva ispunjeni uslovi u pogledu tehničke opremljenosti, zaštite na radu, zaštite i unapređenja životne sredine, sanitarno-higijenskih uslova, kao i da su ispunjeni i drugi uslovi u skladu sa Zakonom, doneseno od strane Službe za privredu, integrisani lokalni razvoj i društvene djelatnosti Općine Vogošća, broj: 03-18-3126/21 dana 12.11.2021. godine;
- Kopija Ugovora o izvođenju radova na čišćenju separatora i septičke jame i odvozu otpadnog mulja i taloga sa lokacije, potpisan sa „DELTA PETROL“ d.o.o. Kakanj, 27.08.2025. godine;
- Kopija Ugovora o isporuci vode cisternom, sklopljen sa JKP „Vodostan“ d.o.o. Ilijaš broj: 1088/25 dana 15.06.2025. godine;
- Kopija Rješenja o vodnoj dozvoli donesenog od strane Agencije za vodno područje rijeke Save Sarajevo, broj: UP-I/25-3-40-347-5/20 dana 24.09.2020. godine;
- Glavni projekat – arhitektura, statički proračun, vodovod i kanalizacija, elektroinstalacije i mašinske instalacije, urađen od strane „SINTEZA“ d.o.o. Visoko, maj 2014. godine;
- Kopija uplatnica upravne pristojbe.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

Razmatrajući predmetni zahtjev i priloženu dokumentaciju utvrđeno je da je priložena sva dokumentacija propisana odredbama člana 12. i 19. Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“ broj 31/15, 55/19, 41/20 i 63/22).

Nakon pregleda dostavljene dokumentacije, u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“ broj 31/15, 55/19, 41/20 i 63/22), izvršen je pregled predmetne lokacije i tom prilikom sačinjen zapisnik o uviđaju broj: UP-1/21-3-40-403-2/25 dana 23.10.2025. godine.

Pregledom dostavljene projektne i druge dokumentacije i izvršenog uviđaja na lokaciji utvrđeno je slijedeće:

Klaonica sitne i krupne stoke „M.I. GORA“ d.o.o. Sarajevo izgrađena je u naselju Kamenica, općina Vogošća. Kapacitet klaonice je 6 t sedmično sirove proizvodnje.

Objekat klaonice se sastoji od slijedećih prostorija: depo za privremeni smještaj stoke prije klanja, prostor za klanje stoke, priprema i narezivanje mesa, prostorija za proizvodnju dnevne kobasice, prostor za pakovanje, rashladne komore, skladište gotovih proizvoda, prostorija za osoblje i garderoba, sanitarni čvor, prostor za odlaganje i čuvanje koža, kancelarije, veterinarska soba, prateća infrastruktura – parking i saobraćajni prostor.

Snabdijevanje objekata vodom se vrši putem dva rezervoara zapremine po 18 m³, koji se pune od strane JP „Vodostan“ d.o.o. Ilijaš.

Porijeklo štetnih i opasnih materija u otpadnoj vodi klaonice najvećim dijelom nastaju u procesu klanja i od pranja radnih površina klaonice i opreme, što upućuje na potrebu sprečavanja dospjevanja krvi i ostataka životinjskog porijekla u otpadne vode, te se prije pranja praktikuje suho čišćenje. Za prihvatanje tehnoloških otpadnih voda od pranja radnih površina i opreme koja se koristi u procesu klanja i obrade mesa izgrađeni su podni slivnici sa linijskim rešetkama i kanalizaciona mreža, koja ove otpadne vode

prikuplja i odvodi u zasebni podzemni betonski dvokomorni vodonepropusni spremnik – osočnu jamu. Krv od iskrvavljenja životinja nakon klanja se prikuplja putem slivnika i skladišti u betonski vodonepropusni podzemni spremnik. Za zbrinjavanje stajnjaka iz objekta za privremeni smještaj stoke izgrađena je vodonepropusna betonska laguna - đubrenka. Sadržaj đubrenke nakon određenog perioda odležavanja se odvozi i odlaže na poljoprivredne površine. Zbrinjavanje konfiskata se vrši u zasebne spremnike-kontejnere, te odvozi na komunalnu deponiju od strane komunalnog preduzeća KJKP „Rad“ d.o.o. Sarajevo. Kože se ne prerađuju u objektu, nego se privremeno skladište u betonskom koritu i predaju trećim licima.

Na osnovu pregleda projektne dokumentacije, utvrđenog činjeničnog stanja i uviđaja izvršenog na predmetnom lokalitetu, a u svrhu smanjenja negativnih uticaja predmetnog objekta i aktivnosti na stanje voda i prava na vode dodijeljena drugim korisnicima, podnosiocu zahtjeva su ovom vodnom dozvolom u tački 3. dispozitiva Rješenja, propisani uslovi kojih se dužan pridržavati pri korištenju objekta, u skladu sa Zakonom o vodama i Pravilnikom o sadržaju, obliku, uvjetima, načinu izdavanja i čuvanja vodnih akata.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Na osnovu provedenog postupka konstatuje se da je podnosilac zahtjeva ispunio minimum uslova za izdavanje vodne dozvole za aktivnosti koje mogu imati specifične uticaje na vode un toku rada klaonice krupne i sitne stoke i prerade mesa sa predmetne lokacije, te je riješeno kao u dispozitivu ovog Rješenja.

Podnosilac zahtjeva je na ime izdavanja ovog vodnog akta izvršio uplatu pristojbe iz tar. broj 43. Zakona o federalnim upravnim pristojbama i Tarifi federalnih upravnih taksi („Službene novine Federacije BiH“, broj 06/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta: Aida Bezdrob, dipl.ing.građ.

Po ovlaštenju
Rukovodilac sektora za izdavanje vodnih akata



Nihad Bezo, dipl.inž.građ.

PRILOG: Glavni projekat – arhitektura, statički proračun, vodovod i kanalizacija, elektroinstalacije i mašinske instalacije, urađen od strane „SINTEZA“ d.o.o. Visoko, maj 2014. godine.

Dostaviti:

- „M.I. GORA“ d.o.o. Sarajevo, Kamenica bb, 71320 Vogošća (sa prilogom)
- ⊖ AVP Sava, ISV – Vodna knjiga
- Sektor 50
- Sektor 40, arhiva
- Oglasna tabla AVP-Sava Sarajevo